

景明刻本鹽邑志林

三十

崔鳴吾紀事

鹽邑志林第四十八帙

鄭端胤

黃岡樊維城彙編

後學姚士麟訂閱

劉祖鐘

鹽官僻在東南海上四封夷曠萬井鱗次無深山
大澤之險蒐藏猛鷲肆爪牙角毒之害故民亦不
知有機獲坎阱之術迺嘉靖戊申有虎從海上來
匿劉侍御墓草間數日樵者見而駭走聞於城中
城中人相率往觀者無慮數百相距步武環立熟
視虎亦堅卧不動衆方以爲可狎也拾瓦礫擲之

有陸堯者擊虎中目虎怒奮呼而起獨爪堯於稠
人中傷其胸腕流血幾死披靡奔竄遺失鞋履折
足傷股者不可勝計虎遂東走海上揭竿斬木以
相逐者日數十百人虎亦失勢窘迫赴海浪湧不
得前返而登岸倉皇以頭觸石陷中爲石所壓進
無可容退不得出有褚氏之僕乘勢鞭之數十虎
亦狼狽垂尾不動褚意其已死欲全而取之利其
皮也舉杖轉石虎從石隙中躍出大吼噬褚擲地
兩脇骨如斬須臾立死衆踉蹌奔命虎亦不顧北
走出境而去莫知所之夫虎必有穴穴必依山山

必險輿而後居海上諸山若秦駐豐雅皆卑瑣平坦無叢林茂藪曲隈深洞可窟虎安從生且其去來無可踪跡至於不妄傷人傷必犯者一時魚然之氣擇人而施曾不遷及輕擊之則爪重擊之則噬報施之平曾不差爽何以故哉吾竊怪夫二人之擊虎者視虎爲何物輕犯其鋒以自貽之戚也然則斯人之知誠不若一戾獸之有覺矣海外諸夷無慮數十種惟日本鴛悍每爲邊患我朝建衛屯兵設舟置堡備亦詳矣百八十年來庶爲無事自四明葦互市之司三江斷舟楫之路於

是私通溢出者釀禍於前亡命逋播者稔亂于後
巨豪猾孽誘致夷人侵掠郡邑而鯨波數揚氛塵
四起矣嘉靖癸丑夏四月二日埃卒報一海舟泊
演武場北去城可二三里邑人以爲漁船相率觀
之城門洞開漫不爲備時則海寧衛總戎王應麟
揚兵北出梁庄協總馬呈圖揚兵南出海寧而居
鹽者惟掌印指揮李元律團操指揮王彥忠數人
耳王卽率陸兵逼其舟而鞫之以木匣浮水致書
云吾日本人也吾修舵卽返吾國無相害也王揮
兵而進舟中人囂然挾弓矢刀劒起立約可七八

十人其人禿髮其聲馱舌其服紋布矢不虛發發輒斃人衆始駭然矣諜報南北二總引兵來援是夕天雨我軍無律星散棲於演武場左右賊乘夜逸其半厥明我軍用火攻船擒十餘人燔死者二十餘人火中脫走者又五六人流至牛橋民家爲典史李茂民兵所殲王應麟王彥忠遂追其逸黨而去又明日有流賊名八大王者四十餘人自金山來經乍浦梁庄過獨山至白馬廟督守梁庄指揮滿朝引兵追之戰死報至協總馬呈圖卽檄指揮采煉徐行健兵次演武場以待六日軍方晨炊

賊突至不及陣而馬與采皆遇害徐走免賊遂過
海鹽逾澉浦直抵海寧界杭州把總陳善道率兵
禦之兵潰而死賊乃奪舟浮錢塘復入海夫以蕞
爾逋寇行掠海上千里曾不少剉而我兵動輒失
利可謂有備乎若王所追逸賊戰於痿婆橋僅傷
一二賊至喪二十餘兵遂繞吾鹽及平湖諸鄉出
乍浦居海口天妃宮適新至賊百餘與合其勢愈
熾王不能禦時守巡叅政潘公恩僉事姜公廷頤
聞報來鎮吾邑而提督軍務中丞王公忬又檄叅
戎湯公克寬率邳兵三百來援湯大閱衛兵及湖

兵得千餘人出攻乍浦賊賊據高公山湯兵鼓噪而登賊皆就擒湯入城撫其民莫不歡呼踴躍時四月二十五日也厥明又五舶泊鹽之新塘嘴黎明登岸抄掠東北城下民家庠生馮大賓與父出走遇害邑人哀之是時民居稠密閭閻富饒瞬息間滿載而去莫敢誰何識者知賊得志必大舉也次日湯叅戎命把總王應麟守乍城班師吾邑守巡公郊迎士民夾路觀之歡聲震天地五月四日賊果大舉船凡三十有七泊龍王塘邑中人登城眺望衆心皇皇皆釜中魚也叅戎公卽率兵由南

門出拒之民間老稚遮道呼號乞留擁馬足不得
前湯遂登城爲守計每城堞一派軍民各一五堞
監以邳兵十堞統以甲長一鋪督以千百戶各門
守以衛揮使藩臬大僚及鄉之縉紳先生賓造秀
士又相與往來協贊爲士卒倡而胥財用給餉饋
轉輸不乏則署印三府鄧公遷也湯親冒矢石往
來巡督不已賊之始至先攻北門次東門矢集城
上如雨至暮則四郊舉火煙焰蔽空吾城守益堅
梆鐸之聲終宵弗撤如是者五晝夜賊乃揚帆而
北分其半由陸路趨乍浦湯曰賊之水陸分道無

去志也此行不攻乍浦必還襲吾鹽吾謹備之不
逾日而乍城果陷把總王應麟遁走指揮姚弘商
霖僅以身免賊入乍城大掠而去夫攻吾鹽也五
晝夜而愈堅攻乍浦也一晝夜而卽陷係所守可
知矣吾鹽百萬生靈不爲乍城之慘者湯力也厥
後湯坐玩寇下詔獄而先達居要津者曾無一人
能以功過爲湯準者崎嶇坎坷數年獲釋是歲冬
莆陽鄭公茂來宰吾邑繕敵臺設南北關都指揮
張公鈇代湯鎮守復濬河隍建土城以爲之備至
於處軍餉修戰具樞機周悉綜理精詳控制吾鹽

爲三吳屏障則郡大夫劉公愨之功尤章明較著也明年甲寅夏四月六日賊衆八百乘二舶抵龍王塘登岸卽燔其舟襲東門不克退而焚小東門及繞城民居數百家而公私廬舍一望赭然矣時叅戎盧公鏜鎮乍浦帥師攻南沙賊而括州義士劉大仲統坑兵五百專守吾邑盧見其能出死力欲藉以立功亦召之去城中遂莫敢爲敵賊乃繞城而西過璵城半邏徑趨郡城郡守劉公督坑湖等兵出戰斬首二十餘級賊復還宿半邏盧叅戎及丁總戎僅聞報自廣陳引兵來晝夜兼程進歷

數百里而趨利初八日與賊遇於孟家堰倉卒阻
河爲陣時方麻麥蓊鬱而伏從中起我兵大潰死
者千餘人指揮李元律義士劉大仲皆戰沒而盧
與丁以善泅走免是夕賊復至鹽厥明犯宋亭村
過澈浦據石墩巡檢司督府檄兵憲羅公拱辰盧
張二叅將都指揮周公應禎帥兵屯海寧是月二
十日戰於石墩敗績周馬蹶而死至五月十八日
賊移輜重奪舟入海爲統兵指揮劉隆潘鼎千戶
晏繼芳等水兵擊敗斬首二百級餘皆溺海死明
年乙卯秋九月松江流賊居陶宅鎮指揮姚弘奉

督府檄討之不克而死又明年丙辰春正月賊首
徐海擁衆數萬與柘林賊陳東合遂分兵北掠淮
陽京口南掠定海慈谿而海與東居柘林總督軍
務胡公宗憲遣兵分屯平湖海鹽間相爲倚角指
揮徐行健奉調截守北王橋與賊遇力戰死之是
年四月六日也賊據柘林爲久駐計列柵爲城開
厰爲室延袤六七里分道四出掠其婦女金帛絲
綿粟米牛羊而聚之盤據不動已而率衆侵峽石
越皂林出烏鎮大掠而西時督學阮公鶚新授提
督之命倉卒與賊遇於皂林卽退保桐鄉而叅將

宗公禮禪將霍公道貫奉 朝命討賊適至乃張
左右翼於桐鄉城下麾兵力戰斬首數百賊衆披
靡欲遁偵知無援縱兵奮擊二將死之遂攻桐鄉
愈急總督胡公亟還省城檄諸路兵爲援廼設間
謀通諭使而桐鄉圍解乃與監督尚書趙公文華
謀遣辯士蔣洲陳可願等入海說王直以衆降得
免罪拜爵蓋直雖久在海島未嘗親犯邊陲自以
罪或可原首肯從命遣養子毛海峰款塞胡公待
之以禮復爲假尚書報聘直信之遂來謁公公執
而誅之又遣謀者說徐海海亦執其黨葉麻陳東

等謝公公每待之優渥海遂無鬪志得遷延數月
徐爲之圖於是諸酋疑海謀亂公乘釁率兵三萬
次平湖阮公率兵二萬次海鹽直隸侍御周公如
斗督永保兵駐金山分道竝進七月二十九日戰
於柘林斬首數百溺海死者無算海復集餘黨據
沈家庄我兵圍之八月八日火攻而入天風助順
烈焰障空海窘迫沈河死而其屬亦無噍類矣夫
自癸丑以來四五年間城門晝閉邑里蕭條田野
皆作戰場廬舍半爲煨燼禍稔東南憂貽西北蓋
亦甚劇矣幸 天威無敵 廟算有成逋寇以次

就擒瘡痍復得安枕思患豫防可一日疎海上備
哉愚用是敬疏顛末告海之司圉者

海鹽東南邊邑其地與海諸夷相望 祖宗來建
衛屯兵備亦甚詳而人情怠於因循修備撤於剏
弛自嘉靖癸丑倭奴入寇五六年間殺傷官兵抄
掠鄉間受禍不淺幸逋寇鋤誅僅云寧止今之海
防亦視昔加備焉試舉大者言之 國初海寧衛
與澉浦乍浦二守禦所皆統於備倭把總而受節
制於總督都指揮然以一總督統臨觀松海金盤
海寧四總地方千餘里不相應援嘉靖丙辰始因

兵部題請裁革總督設叅將二員分鎮兩浙而浙西道叅將則開府海鹽仍勅備倭把總以欽依行事此將領沿革之制也國初浙東諸衛皆設戰船獨海寧衛以沙淺止於水路設哨船十隻陸路設騎兵四十南北分哨與澈乍二所聲援相應然出海官軍更番代易殊無專任不習水道尋亦裁革撤舟置堡旣又減去騎兵之半則備益弛而南北不相應接寇至不知倉皇失措今督撫會議於海洋間依山阻險建三關泊戰艦一割海鹽之秦駐山一割澈浦之黃道廟一割乍浦之唐家